

উল্লেখযোগ্য তথ্য এবং মূল্য সংবেদনশীল তথ্য প্রকাশ
নীতিমালা



UNION BANK PLC.
SHARIAH BASED BANK

শেয়ার ডিভিশন,

ইউনিয়ন ব্যাংক পিএলসি.

প্রধান কার্যালয়, ঢাকা-১২১২.

পরিসীমা।- এই নীতিমালাটি ইউনিয়ন ব্যাংক পিএলসি. এর সকল স্পনসর, পরিচালক, সংশ্লিষ্ট কর্মকর্তা ও কর্মচারী এবং অন্যান্য অভ্যন্তরীণ ব্যক্তিদের জন্য প্রযোজ্য যারা মূল্য সংবেদনশীল তথ্য এর আওতায় আসতে পারে।

উদ্দেশ্য।- এই উল্লেখযোগ্য তথ্য ও মূল্য সংবেদনশীল তথ্য প্রকাশ নীতিমালার লক্ষ্য হচ্ছে যে সমস্ত ম্যাটেরিয়াল এবং নন-পাবলিক তথ্য যা ইউনিয়ন ব্যাংক পিএলসি. এর শেয়ার মূল্যকে সম্ভাব্যভাবে প্রভাবিত করতে পারে তা বাংলাদেশে প্রযোজ্য আইন ও প্রবিধান মেনে যথাযতভাবে প্রকাশিত এবং পরিচালনা করা হয় তা নিশ্চিত করা।

লক্ষ্যসমূহ।- মূল্য সংবেদনশীল তথ্যের সাথে সম্পর্কিত এই নীতিমালাতে উল্লিখিত উদ্দেশ্যগুলি নিয়ন্ত্রক সংস্থা কর্তৃক সময় সময় জারীকৃত মূল্য সংবেদনশীল তথ্যের সাথে সম্পর্কিত বিধি, প্রবিধান, বিজ্ঞপ্তি, আদেশ, নির্দেশিকা, ইত্যাদি বিধান দ্বারা নিয়ন্ত্রিত হবে। এই নীতিমালার মূল লক্ষ্য হচ্ছে সময়ে সময়ে মূল্য সংবেদনশীল তথ্য প্রদানের বিষয়ে সিদ্ধান্ত নেওয়ার সময় ইউনিয়ন ব্যাংক পিএলসি. এর পরিচালনা পর্ষদ এই সকল মানদণ্ড এবং পরামিতি গুলোকে বিবেচনা করবে। এই নীতিমালা কোম্পানির মূল্য সংবেদনশীল তথ্যের ব্যবহার, সরবরাহ এবং প্রকাশনার ক্ষেত্রে প্রযোজ্য হবে।

সুনির্দিষ্ট লক্ষ্যসমূহঃ-

- অভ্যন্তরীণ তথ্যের যথাযথ সংগ্রহ এবং সংরক্ষণ নিশ্চিত করা যাতে নিয়ন্ত্রক সংস্থাগুলোকে প্রয়োজন অনুযায়ী তথ্য সরবরাহ করা যায়।
- ইনসাইডার-ট্রেডিং এবং তাদের অসাধু চর্চা নিষিদ্ধ করা।
- বিনিয়োগ সিদ্ধান্তকে প্রভাবিত করতে পারে এমন ম্যাটেরিয়াল ইনফরমেশনে প্রবেশাধিকার প্রদান করে শেয়ারহোল্ডার, বিনিয়োগকারী এবং অন্যান্য স্টেকহোল্ডারদের স্বার্থ রক্ষা করা।
- মূল্য সংবেদনশীল তথ্য পরিচালনা এবং প্রকাশ করার জন্য নির্দেশিকা নির্ধারণ করে এবং কর্মকর্তা-কর্মচারী ও অভ্যন্তরীণ ব্যক্তিদের জন্য ট্রেডিং বিধিনিষেধ প্রয়োগ করে ইনসাইডার ট্রেডিং এবং মার্কেট ম্যানিপুলেশন প্রতিরোধ করা।
- সমস্ত যোগাযোগ ও প্রকাশনাগুলি সঠিক, সময়োপযোগী এবং প্রযোজ্য আইন ও প্রবিধানের সাথে এর সামঞ্জস্যতা নিশ্চিত করে ব্যাংকের সুনাম এবং বিশ্বাসযোগ্যতা রক্ষা করা।
- মূল্য সংবেদনশীল তথ্য নীতির গুরুত্ব, তাদের দায়িত্ব এবং নন-কমপ্লাইন্স এর পরিণতি সম্পর্কে কর্মচারীদের অবগত করে ব্যাংকের মধ্যে সচেতনতা এবং জবাবদিহিতার সংস্কৃতি প্রচলন ও প্রচার করা।
- সংবেদনশীল তথ্যের নির্দেশনা এবং দায়িত্বের একটি স্পষ্ট চেইন সৃষ্টি করার উদ্দেশ্যে মূল্য সংবেদনশীল তথ্য মনিটরিং, রিপোর্টিং এবং প্রকাশের জন্য দায়িত্বপ্রাপ্ত ও মনোনীত কর্মী বা কর্মীদল গঠন করা।
- নিয়ন্ত্রক পরিবেশে সর্বোত্তম অনুশীলন এবং পরিবর্তনগুলোর প্রতিফলন এর জন্য মূল্য সংবেদনশীল তথ্য সম্পর্কিত ব্যাংকের অভ্যন্তরীণ নিয়ন্ত্রন এবং পদ্ধতিগুলো নিয়মিত পর্যালোচনা, আপডেট এবং উন্নীত করা হয়েছে তা নিশ্চিত করা।

মূল্য সংবেদনশীল তথ্য (Price Sensitive Information) তালিকা।- ইউনিয়ন ব্যাংক পিএলসি.

মূল্য সংবেদনশীল তথ্য হিসাবে, অন্যান্যের মধ্যে, নিম্নবর্ণিত তথ্যাবলীকে গণ্য এবং প্রকাশ করিবে, যথা: -

- (অ) আর্থিক অবস্থা সম্পর্কিত প্রতিবেদন, আর্থিক অবস্থার ফলাফল বা এতদসংক্রান্ত মৌলিক তথ্য;
- (আ) লভ্যাংশ ও কর্পোরেট ঘোষণা তথ্য;
- (ই) কর্পোরেট কাঠামো পরিবর্তন সংক্রান্ত তথ্য; যথা- একীভূতকরণ, বিভক্তিকরণ(Demerger), অধিগ্রহণ, অবসায়ন, রূপান্তর বা হস্তান্তর সংক্রান্ত তথ্য;
- (ঈ) পুর্জি কাঠামো (Capital Structure) পরিবর্তন সংক্রান্ত;
- (উ) ব্যবসায় কার্যক্রম সম্প্রসারণ, পরিবর্তন, ইত্যাদি সংক্রান্ত তথ্য;
- (ঊ) ফান্ড ব্যবস্থাপনা ও ফান্ডের কাঠামোগত পরিবর্তন সংক্রান্ত তথ্য;
- (ঋ) কমিশন কর্তৃক প্রণীত বা অনুমোদিত বা জারীকৃত অন্য কোনো বিধিমালা বা প্রবিধানমালা বা আদেশ বা নির্দেশ বা প্রজ্ঞাপনে মূল্য সংবেদনশীল তথ্য হিসেবে নির্ধারিত কোনো তথ্য;
- (এ) কমিশন কর্তৃক সময় সময় সরকারি গেজেটে জারীকৃত প্রজ্ঞাপন দ্বারা নির্ধারিত অন্য কোনো তথ্য;

উল্লেখযোগ্য তথ্য (Material Information) তালিকা।- নিম্নবর্ণিত উল্লেখযোগ্য তথ্যসমূহের

(Material Information) মধ্যে সুবিধাভোগী ব্যবসা নিষিদ্ধকরণ বিধিমালা, ২০২২ এর বিধি ৩ এর উপ-বিধি (১) অনুযায়ী যে সকল তথ্যে তালিকাভুক্ত সিকিউরিটি বা ফান্ডের ইউনিটের মূল্য সংবেদনশীলতা রহিয়াছে বা যে সকল তথ্যে কোনো যুক্তিসংগত বিনিয়োগকারীর বিনিয়োগ সিদ্ধান্ত গ্রহণের ক্ষেত্রে প্রভাবক হিসেবে বিবেচিত হইতে পারে সেসকল তথ্য ইউনিয়ন ব্যাংক পিএলসি. মূল্য সংবেদনশীল তথ্য হিসেবে প্রকাশ করিবে।

উক্ত মূল্য সংবেদনশীল তথ্য ব্যতীত নিম্নবর্ণিত অন্য সকল তথ্য উল্লেখযোগ্য তথ্য (Material Information) হিসেবে ইউনিয়ন ব্যাংক পিএলসি. উহার দাপ্তরিক ওয়েবসাইটে প্রকাশ করিবে, যথা:-

১। আর্থিক অবস্থার পরিবর্তন সংক্রান্ত প্রভাবক, যেমনঃ-

- (ক) আর্থিক বিবরণীর পরিবর্তন, যেমন- আয়, ব্যয়, নগদ প্রবাহ, প্রাপ্য, দায় বা সম্পদ ইত্যাদির উল্লেখযোগ্য হ্রাস বা বৃদ্ধি ও অধিকাংশ বা উল্লেখযোগ্য সম্পদের পুনর্মূল্যায়ন বা উল্লেখযোগ্য হ্রাস-বৃদ্ধি বিষয়ক কোনো তথ্য বা বিবৃতি বা মন্তব্য;
- (খ) আর্থিক বিবরণীর নিম্নোক্ত তুলনামূলক তথ্যাদি:
 - (অ) শেয়ার/ইউনিট প্রতি আয়;
 - (আ) শেয়ার/ইউনিট প্রতি নীট পরিচালনাগত নগদ প্রবাহ;
 - (ই) শেয়ার/ইউনিট প্রতি নীট সম্পদ মূল্য;
- (গ) ইস্যুয়ার বা ফান্ডের সম্পদের মূল্য অথবা সম্পদের সংমিশ্রণের উল্লেখযোগ্য পরিবর্তন;
- (ঘ) প্রতিশন সংরক্ষণ সম্পর্কিত সংশ্লিষ্ট ইস্যুয়ারের নিয়ন্ত্রণকারী কর্তৃপক্ষ কর্তৃক কোনো বিশেষ নির্দেশনা বা পূর্বে প্রদত্ত কোনো বিশেষ নির্দেশনার পরিবর্তন; এবং
- (ঙ) ইস্যুয়ারের অথবা ফান্ডের একাউন্টিং পলিসির কোনো পরিবর্তন, ইত্যাদি।

২। কর্পোরেট ঘোষণা সংক্রান্ত তথ্যাদি, যেমনঃ-

- (ক) লভ্যাংশ সংক্রান্ত যে কোনো সিদ্ধান্ত;
- (খ) সিকিউরিটিহোল্ডারগণকে রাইট, বোনাস ইস্যুর ঘোষণা বা ইস্যু করা বা অনুরূপ সুবিধা প্রদানের সিদ্ধান্ত;
- (গ) বিনিয়োগকারীদের প্রাপ্যতা সম্পর্কিত কর্পোরেট ঘোষণা বা অন্য কোনো তথ্য; এবং
- (ঘ) লভ্যাংশ বিতরণ পলিসি পরিবর্তন, ইত্যাদি।

৩। কর্পোরেট কাঠামো পরিবর্তন সংক্রান্ত তথ্যাদি, যেমনঃ-

- (ক) বিদ্যমান সম্পদের ৫% বা তাহার বেশি কোনো সম্পদের অধিগ্রহণ বা অবসায়ন;
- (খ) কোম্পানির সহিত অন্য কোম্পানির একিভূতকরণ বা কোনো কোম্পানির উল্লেখযোগ্য শেয়ার অর্জন ও অধিগ্রহণ, ইত্যাদি;
- (গ) কোম্পানির কোনো ইউনিটকে বিভক্তিকরণ (Demerger);
- (ঘ) কোম্পানির কোনো ইউনিটের রূপান্তর বা অবসায়ন;
- (ঙ) ক্যাপিটাল রিঅর্গানাইজেশন বা একিভূতকরণ বা বিভক্তিকরণের মাধ্যমে কর্পোরেট কার্যক্রমের পরিবর্তন;
- (চ) কোনো কোম্পানির কর্তৃত্ব গ্রহণ (টেক-ওভার) প্রস্তাব বা অভ্যন্তরীণ সেবার অধিগ্রহণ প্রস্তাব;
- (ছ) কোম্পানির নিয়ন্ত্রনে প্রভাব ফেলতে পারে এইরূপ মালিকানার পরিবর্তন; এবং
- (জ) নাম বা ঠিকানা পরিবর্তন, ইত্যাদি।

৪। পুঁজি কাঠামো পরিবর্তন সংক্রান্ত তথ্যাবলি, যেমনঃ-

- (ক) সিকিউরিটির প্রাইভেট বা পাবলিক বা রাইটস অফার অথবা এর পুঁজি কাঠামোর পরিবর্তন সংক্রান্ত কোনো সিদ্ধান্ত;
- (খ) সিকিউরিটি বা ফান্ডের ইউনিট পরিকল্পিতভাবে পুনঃক্রয় বা রিডেমপশন;
- (গ) যে কোনো শেয়ার কনসোলিডেশন, শেয়ার বিনিময়, কোনো সিকিউরিটিকে ইকুইটি সিকিউরিটিতে রূপান্তর অথবা ঋণপত্রকে শেয়ারে রূপান্তর সংক্রান্ত সিদ্ধান্ত; এবং
- (ঘ) সিকিউরিটিহোল্ডারদের অধিকার সংক্রান্ত উল্লেখযোগ্য পরিবর্তন, ইত্যাদি।

৫। ব্যবসা কার্যক্রমের সম্প্রসারণ, পরিবর্তন ইত্যাদি সংক্রান্ত তথ্যাদি, যেমনঃ-

- (ক) কোম্পানির প্রযুক্তি, উৎপাদন বা স্থাপনা সম্পর্কিত উল্লেখযোগ্য কোনো উন্নয়ন বা পরিবর্তন;
- (খ) উল্লেখযোগ্য পুঁজি বিনিয়োগ অথবা প্রতিষ্ঠানের উদ্দেশ্যের উল্লেখযোগ্য পরিবর্তন;
- (গ) উল্লেখযোগ্য নতুন চুক্তি, উৎপাদন, প্যাটেন্ট, সেবা অথবা ব্যবসায়িক পরিবর্তন;
- (ঘ) দীর্ঘমেয়াদী অনাদায়ী তহবিলের উল্লেখযোগ্য আদায়;
- (ঙ) প্রধান নির্বাহী, সিইও, সিএফও, কোম্পানি সচিবসহ পরিচালনা পর্ষদ এর পরিবর্তন বা পদত্যাগ বা পদচ্যুতি;

- (চ) বিধিবদ্ধ নিরীক্ষক বা কর্পোরেট গভর্নেন্স কমপ্লায়েন্স অডিটর, ক্রেডিট রেটিং কোম্পানির পরিবর্তন;
- (ছ) লিগ্যাল প্রসেডিংস শুরুকরণ বা রেগুলেটরী বিষয়াদির উন্নয়ন অথবা কোনো উল্লেখযোগ্য রায় বা আদেশ;
- (জ) স্টক এক্সচেঞ্জ হইতে সিকিউরিটি বা ফান্ডের ইউনিটের তালিকাচুক্তি বা এক ক্যাটাগরি হতে অন্য ক্যাটাগরিতে পরিবর্তন;
- (ঝ) উল্লেখযোগ্য ম্যানেজমেন্ট কন্ট্রাক্ট, ইনভেস্টরস রিলেশন এগ্রিমেন্ট, সার্ভিস এগ্রিমেন্ট, অথবা রিলেটেড পার্টি ট্রানজেকশন যাহা আর্থিক বিবরণীকে উল্লেখযোগ্যভাবে প্রভাবিত করিতে পারে এইরূপ কোনো চুক্তি;
- (ঞ) কোনো স্থায়ী সম্পত্তি ক্রয় বিক্রয়ের সিদ্ধান্ত বা প্লান্ট বা মেশিনারীর সংস্কার বা উন্নয়ন বা সম্প্রসারণ (BMRE) বা নূতন ইউনিট স্থাপন সংক্রান্ত তথ্য; এবং
- (ট) আন্তঃকোম্পানি বা সাবসিডিয়ারী বা সহযোগী প্রতিষ্ঠানের মধ্যে উল্লেখযোগ্য অগ্রিম বা ঋন প্রদান বা গ্রহণ বা পরিচালকদের সাথে ঋন আদান-প্রদান, ইত্যাদি।

৬। ঋন ব্যবস্থাপনা সম্পর্কিত তথ্যাদি, যেমনঃ-

- (ক) পরিশোধিত মূলধন বা নীট সম্পদ মূল্যের মধ্যে যাহা অধিক তাহার ২৫% বা তাহার বেশি পরিমাণ ঋন গ্রহণ ও পরিশোধ;
- (খ) উল্লেখযোগ্য সম্পদ দায়বদ্ধকরণ অথবা দায়মুক্তকরণ;
- (গ) কোনো ব্যাংক বা পাওনাদার বা ঋণপত্রের দায় বা দেনা পরিশোধে ০৬ (ছয়) মাসের অধিক সময়ের ব্যর্থতা;
- (ঘ) উল্লেখযোগ্য নতুন চুক্তি; এবং
- (ঙ) বৈদেশিক ঋন চুক্তি বা বিনিয়োগ চুক্তি, ইত্যাদি।

৭। ফান্ড ব্যবস্থাপনা ও কাঠামো পরিবর্তন সম্পর্কিত তথ্যাদি, যেমনঃ-

- (ক) ফান্ডের মেয়াদ বর্ধন-কর্তন;
- (খ) ফান্ডের অবসায়ন;
- (গ) ফান্ডের রূপান্তর;
- (ঘ) কোনো একক সিকিউরিটিতে ফান্ডের ১০% বা তাহার বেশি বিনিয়োগ;
- (ঙ) কোনো উল্লেখযোগ্য বিনিয়োগ নগদায়নে লাভ বা ক্ষতি; এবং
- (চ) ফান্ডের ট্রাস্টার গঠন, ট্রাস্ট দলিলের কোনো পরিবর্তন, ইত্যাদি।

৮। অন্যান্য, যেমনঃ-

- (ক) কোনো গুরুত্বপূর্ণ চুক্তি স্বাক্ষর বা পূর্বে ঘোষিত/ স্বাক্ষরিত চুক্তি বাতিল বা উল্লেখযোগ্য সংশোধন;

- (খ) কোম্পানি বা ইস্যুয়ারের উল্লেখযোগ্য কোনো সম্পদের ক্ষতি বা উহার ভাবমূর্তি ক্ষুণ্ণকারী কোনো ঘটনা;
- (গ) পূর্বে ঘোষিত কোনো প্রকল্প বাতিল বা উহার উল্লেখযোগ্য সংশোধন; এবং
- (ঘ) ইস্যুয়ার বা ফান্ডের অডিটর কর্তৃক কোয়ালিফাইড প্রতিবেদন দাখিল, ইত্যাদি।

মূল্য সংবেদনশীল তথ্য প্রকাশ।-

- (১) তালিকাভুক্ত কোম্পানি বা ফান্ড বা সিকিউরিটির ইস্যুয়ার বা ফান্ডের ব্যবস্থাপক বা ব্যবস্থাপনা কর্তৃপক্ষ বা ট্রাস্টি উপ-বিধি (১) এর তথ্যসমূহের মূল্য সংবেদনশীলতা বিবেচনা করিবার ক্ষেত্রে তফসিল-ক অনুসরণপূর্বক উল্লেখযোগ্য তথ্য এবং মূল্য সংবেদনশীল তথ্য প্রকাশ নীতিমালা (Principles on Disclosure of Material information and price sensitive information) প্রস্তুত করিবে এবং এই বিধিমালা সরকারি গেজেটে প্রকাশিত হইবার তারিখ হইতে ৩(তিন) মাসের মধ্যে উক্ত নীতিমালা নিজস্ব ওয়েবসাইটে প্রকাশ করিবে।
- (২) তালিকাভুক্ত সিকিউটির ইস্যুয়ার ও ফান্ডের ব্যবস্থাপক তফসিক-ক অনুসরণ পূর্বক উপবিধি (২) এ বর্ণিত নীতিমালা অনুযায়ী উল্লেখযোগ্য তথ্য (Material Information) নিজস্ব ওয়েবসাইটে প্রকাশ করিবে এবং উল্লেখযোগ্য তথ্যাদির মধ্যে উপ-বিধি (১) অনুযায়ী যেগুলো মূল্য সংবেদনশীল তথ্য হিসেবে বিবেচিত, উহা বিধি ৬ মোতাবেক প্রকাশ করিবে।
- (৩) তালিকাভুক্ত সিকিউটির ইস্যুয়ার ও ফান্ডের ব্যবস্থাপক কমপক্ষে বিগত ৩ (তিন) বছরে প্রকাশিত সকল মূল্য সংবেদনশীল তথ্য (Price Sensitive Information) ও উল্লেখযোগ্য তথ্য (Material Information) নিজস্ব ওয়েবসাইটে সংরক্ষণ করিবে।
- (৪) কমিশন, সরকারি গেজেটে প্রকাশিত আদেশ দ্বারা, অন্য কোনো তথ্যকেও মূল্য সংবেদনশীল তথ্য বা উল্লেখযোগ্য তথ্য হিসেবে নির্ধারণ করিতে পারিবে।
- (৫) তালিকাভুক্ত কোম্পানি বা ফান্ড বা সিকিউরিটির ইস্যুয়ার বা ফান্ডের ব্যবস্থাপক বা ব্যবস্থাপনা কর্তৃপক্ষ বা ট্রাস্টি, কমিশন কর্তৃক সময় সময় নির্ধারিত পদ্ধতিতে, সকল সুবিধাভোগীর তথ্য সংরক্ষণ করিবে এবং উক্ত তথ্য সংশ্লিষ্ট স্টক এক্সচেঞ্জ ও কমিশনকে সরবরাহ করিবে:

তবে শর্ত থাকে যে, সংশ্লিষ্ট স্টক এক্সচেঞ্জ বা কমিশনের কোনো কর্মকর্তা উক্ত তথ্যবলি কমিশনের পূর্বানুমোদন ব্যতিত কাহারো নিকট প্রকাশ করিতে পারিবে না।

মূল্য সংবেদনশীল তথ্য সরবরাহের পদ্ধতি। - (১) স্টক এক্সচেঞ্জে তালিকাভুক্ত সিকিউরিটির ইস্যুয়ার বা ফান্ডের ব্যবস্থাপক বা প্রযোজ্য ক্ষেত্রে ট্রাস্টি উহার কোনো মূল্য সংবেদনশীল তথ্য সংশ্লিষ্ট বিষয়ে সিদ্ধান্ত গ্রহণ বা সংশ্লিষ্ট প্রাথমিক নিয়ন্ত্রণকারী প্রতিষ্ঠানের অনুমোদনের জন্য প্রস্তাব প্রেরণের নিমিত্তে সিদ্ধান্ত গ্রহণ এর ২ (দুই) ঘন্টার মধ্যে কিংবা তথ্যটি উহার গোচরে আসার তারিখেই তাৎক্ষণিকভাবে উহার চেয়ারম্যান,

প্রধান নির্বাহী কর্মকর্তা বা কোম্পানির সচিব এর স্বাক্ষরে লিখিতভাবে একই সাথে কমিশন এবং সংশ্লিষ্ট স্টক এক্সচেঞ্জে এর নিকট ই-মেইল, ফ্যাক্স , ডিজিটাল সাবমিশন প্ল্যাটফর্ম বা বিশেষ বার্তা বাহক মারফত, ক্ষেত্রবিশেষে কুরিয়ার সার্ভিসযোগে প্রেরণ করিবে; এবং উক্ত তথ্য বহুল প্রচারিত দুইটি দৈনিক পত্রিকায় (একটি বাংলা এবং অপরটি ইংরেজী) এবং একটি অনলাইন (Online) পত্রিকায় অবিলম্বে প্রকাশনা নিশ্চিত করিবে এবং একইসাথে সংশ্লিষ্ট ইস্যুয়ার বা ফান্ডের ব্যবস্থাপক বা প্রযোজ্য ক্ষেত্রে ট্রাস্টি ওয়েবসাইটে প্রকাশ করিবে।

- (২) তালিকাভুক্ত সিকিউরিটির ইস্যুয়ার বা ফান্ডের ব্যবস্থাপক বা ট্রাস্টি সিকিউরিটি বা ইউনিট এর মূল্য প্রভাবিত করিবার উদ্দেশ্যে কোনো মিথ্যা বা অসত্য মূল্য সংবেদনশীল তথ্য প্রকাশ করিবে না কিংবা মিথ্যা বা অসত্য তথ্য সরবরাহ বা প্রকাশে কোনো ব্যক্তিকে প্ররোচিত করিবে না।
- (৩) তালিকাভুক্ত সিকিউরিটির ইস্যুয়ার বা ফান্ডের ব্যবস্থাপক বা ট্রাস্টি কর্তৃক প্রেরিত বা প্রকাশিত উক্তরূপ তথ্যটিতে ইস্যুয়ার বা ফান্ডের ব্যবস্থাপক বা ট্রাস্টির পরিচালনা পর্ষদের সিদ্ধান্ত গ্রহণের তারিখ ও সময়, কিংবা ক্ষেত্রমতে তথ্যটি উহার গোচরে আসার তারিখ উল্লেখ করিতে হইবে।
- (৪) কোন সিকিউরিটি বা সিকিউরিটির ইস্যুয়ার বা ফান্ডের মূল্য সংবেদনশীল তথ্য সম্পর্কিত কোনো বিষয়ে উহার সংশ্লিষ্ট নিয়ন্ত্রণকারী কর্তৃপক্ষের অনুমোদনের জন্য ইস্যুয়ার বা ফান্ডের ব্যবস্থাপক প্রযোজ্য ক্ষেত্রে ট্রাস্টি কর্তৃক প্রস্তাবিত হইলে, ইস্যুয়ার বা ফান্ডের ব্যবস্থাপক নিয়ন্ত্রণকারী কর্তৃপক্ষের অনুমোদনের জন্য প্রস্তাব প্রেরিত হইয়াছে মর্মে সংশ্লিষ্ট মূল্য সংবেদনশীল তথ্যের ঘোষণায় উল্লেখ করিতে হইবে এবং উক্ত বিষয় নিয়ন্ত্রণকারী কর্তৃপক্ষের অনুমোদনের বা সিদ্ধান্ত প্রাপ্তির ০২ (দুই) ঘন্টার মধ্যে উপ-বিধি (১) মোতাবেক পুনরায় মূল্য সংবেদনশীল তথ্য প্রকাশ নিশ্চিত করিবে।
- (৫) সংশ্লিষ্ট স্টক এক্সচেঞ্জ উক্ত তথ্য পাওয়া মাত্র উহা স্টক এক্সচেঞ্জের ওয়েবসাইটে প্রকাশ, ট্রেডিং মনিটর বা অন্য কোনো অনুমোদিত মাধ্যমে প্রচার করিবে।
- (৬) যে কোনো অতিরঞ্জন এড়াইবার জন্য সহজ ও সাবলীল ভাষায় মূল্য সংবেদনশীল তথ্য প্রকাশ করিতে হইবে।
- (৭) মূল্য সংবেদনশীল তথ্য সম্পর্কিত বিষয়াদির ঘটনা পরিক্রমা একটি ডিজিটাল ডাটাবেইজে সংরক্ষণ করিতে হইবে।

তথ্যের গোপনীয়তা।-

- (ক) ইস্যুকারী মূল্য সংবেদনশীল তথ্যেও ব্যবহারকারীর স্বার্থে সমস্ত অপ্রকাশিত মূল্য সংবেদনশীল তথ্য নিজস্ব তত্ত্বাবধানে গোপন রাখবে।
- (খ) ইস্যুয়ারের অভ্যন্তরীণ ব্যক্তি তথ্যের গোপনীয়তা বজায় রাখবে।

নীতিমালার সংশোধন।- বোর্ড প্রযোজ্য আইন সাপেক্ষে যে কোনো সময় এই নীতিমালা সংশোধন, স্থগিত বা প্রত্যাহার করতে পারে। এই নীতিমালার যে কোনো দুর্বোদ্ধতা বা অস্পষ্টতা বোর্ড এবং অথবা বোর্ডেও ম্যানেজমেন্ট কমিটি এই নীতিমালার বিস্তৃত অভিপ্রায়ের সাথে সামঞ্জস্য রেখে যখন প্রয়োজন হবে তার সমাধান করবে।

ডিসক্লেইমার।- এই নীতিমালা টি কোম্পানীর সিকিউরিটি গুলোতে বিনিয়োগের জন্য কেনো অনুরোধ হিসাবে ব্যখ্যা করা হবে না বা কোম্পানীর সিকিউরিটিজে বিনিয়োগের ক্ষেত্রে গ্যারান্টিসহ রিটার্নেও কেনো নিশ্চয়তা হিসাবে কাজ করবে না।

আইনের পরিবর্তন।- আইনের বিধান বা লিস্টিং রেগুলেশন সহ বাংলাদেশ সিকিউরিটিজ অ্যান্ড এক্সচেঞ্জ কমিশন (বিএসইসি) থেকে পরবর্তিতে কেনো নিয়ম বা প্রবিধান বা নির্দেশনা জারী করা হলে তা যদি এই নীতিমালার কেনো বিধানের সাথে অসামঞ্জস্যতা সৃষ্টি করলে ঐ সকল আইন বা প্রবিধানগুলো এই নীতিমালার উপর প্রাধান্য পাবে এবং প্রযোজ্য আইনের সাথে সামঞ্জস্যতা রেখে প্রাসঙ্গিক বিধানগুলো যথাসময়ে সংশোধন করা হবে।